

Maila cotschna

Raquent da cuntinuaziun (2)

■ Puspè passa in grond camiun. Ella prenda en mira la tavla en cabina cun si il num dal manischunz. Rene. Senza aigu. Cun tutta forza tira ella il minz dal mail envers la noda. Plocc. Ina pitschna grupp da scolars che passa gist guarda cun egl grond e ri lura da schluppar. Ella fa ina tschera seriusa sco sche tut quai na pertutgass betg ella. «Uffants dal huz», sdiavla il manischunz dal camiun da finestra or. Cura ch'il camiun è passà sfrigna ella cuntenta. Ella studegia dad ir giu en il Coop per in proxim mail.

Ella prenda la stgala rullanta ed entra en il labirint che sa stenda sut la staziun principala. In cuvel gigantesc sromà en tuttas direcziuns, cun bratscha lunga musculusa en las qualas ils binaris sa filan sco in sistem d'avainas. Las stizuns tatgan a l'ur da questa roma sco pitschens gniesu u zups da nuschs ch'in stgilat ha piazzà cun sistem u ord spira casualità in sper l'auto. Ella entra en il zup da nuschs cun

la meglra maila e va tar la partiziun da fritgs. Là sa mantun'la, la maila. Quella da Boscop en cotschen u verd, ma per il solit memia lom, Jonagold sco colurà dal tramunt, Braeburn dulsch e frestg, Gala sco da farina e Golden delicious grond ed empermettent, ma en general plitost dischillusiunant. Ella avess da prender in da tut quella maila da la Svizra, la schelta è gronda. Bio, social, fair e tut. Ma ella sa: Maila cotschna vesa ora bain, ma n'èn betg tge ch'ella para. Ella prenda adina ils mails verds. Ses maun tschiffa en il regal da maila, dretg sper ils boscops cotschens. Granny Smith, straverd, importà da l'Australia cun fermativa en ils Emirats. Ils pli aschs, quels che paran il pli toxic. Là san ins tge ch'ins chatta. Morder en il mail asch, din ins giu qua. Quai na la para betg adattà. Morder atras è quai ch'ella fa.

Ses telefonin schuschura. «Hey!», stat ti scrit. In segund messadi: «Nua ès?» e

lura gist anc in terz: «Hai huaa lungurus...» Ella sfrigna, prenda il mail en bucca e cumenza a tippar cun omadus mauns, cun ils poleschs: «Sun el Coop, hai mancantà il tren. Ma forse vom jau tuttina anc.» Il messadi fa in «fuuu» cura ch'el sa fa sin viadi. La resposta vegn immediat: «Granny smith? ;-)» Ella prenda ina murdida e trametta enavos in polesch auzà. Lura tschenta ella il mail sin la stadaira e smatga il 92. Ella tatga il tagader che la macchina spida ora sin la palma-maun e prenda puspè en bucca il mail. «Ès en biro?», tippescha ella. «Positiv. Stoss anc spetgar exact 47 min.». Ed ina secunda pli tard: «Tge fas questa saira?»

Ell'è arrivada tar la cassa. «Spetga stoss pajar spert», tippescha ella cun omadus mauns. Lura tegna ella vi il maun cun il tagader a la cassiera.

*Cuntinuaziun suonda
Viola Pfeiffer*